



Ilinniartitsisunngorlaat meeqqanut inuusuttunullu tarnikkut ajornartorsiutilinnut pitsaanagerusumik sullissisinnaangornissaat anguniarlugu ilinniartitsisunngorniarnermi tarnip pissusaa pillugu ikiuigasuarsinnaaneq aammalu meeqqat tarnikkut nappaatigisartagaat pillugit ilisimatusarneq eqqunneqarnissaat anguniarlugu Naalakkersuisut sulissuteqassallutik peqqunneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatinit Inatsisartunut ilaasortamut Anna Wangenheim-imut siunnersuummut pitsaasumut soqutigintumullu.

ADD, ADHD aamma autisme-mik nappaateqalertut amerlingaluttuinnarput. Tassungalu ilutigalugu meeqqat inuusuttullu taakkununga atasumik atugarliortut takusalersigut pingaartuuvoq naqissusissallugu, imaangilaq taakku ataqatigiinngitsut. Atugarliortoqarsinnaalluarpoq nappaateqarani, aammalu nappaateqarluni atugarissaartoqarsinnaalluarluni.

Arlalinnik nappaatinik suussusersineqarsimasut aammalu meeqqat inuusuttullu atugarliornerulernerat oqaasinnngussallugu pingaartuuvoq. Imminut toquttarnermut pinaveersaartitsisinnaavoq siunissamilu inersimasunik ingerlalluartunik pilersitsisinnaalluni. Tamanna tungavigalugu pingaarutilik unaavoq, inuiaqatigiinni sumiluunnit tarnikkut nappaatinut aammalu atugarliornernut ilisimasagut annertusiartormata. Tamanna pingaartumik ilinniartitsisut perorsaasuni atuuppoq, taakkumi ulluinnarni meeqqanut atassuteqartuummata. Tassunga atatillugu pingaartuuvoq piginnaasat eqqortut piginissaat meeqqat ajornartorsiuteqartut atugarliuteqarnersut imaluunniit nappaatinik arlalinnik peqarnersut paasisinnaaniassammassuk.

Una tarnip pissusaa pillugu ikiuigasuarsinnaanermik siunnersuut aammalu meeqqat tarnikkut nappaatigisartagaat pillugit ilinniartitsisunngorniarnermi ilisimasaqarnissamik siunnersuut Demokraatit Inatsisartunut ilaasortaataannit Anna Wangenheim-imit isumassarsiatsialassuuvoq. Sakkussaavoq pitsaasoq, atugarliornerit pinaveersaartinnissaannut meeqqallu nappaataasa suussusersinissaasa siusinnerusukkat pisinnaanerinut.

Demokraatit siunnersuut akuereqqullugu innersuussutigaat ataatsimiititaliamilu susassaartumi suliareqqinneqarnissaa innersuussutigalugu.